



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ

ՈՐՈՇՈՒՄ

--- հունվարի 2021 թվականի N°---Ա
ք. Երևան

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎԻ 2019 ԹՎԱԿԱՆԻ ՀՈՒԼԻՍԻ 31-Ի N°278Ա ՈՐՈՇՄԱՆ ՄԵՋ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ

Հաշվի առնելով, որ՝

ա) «ԱՐԵԳ ԷՆԵՐԳԻԱ» սահմանափակ պատասխանատվությամբ ընկերությունը (այսուհետ՝ Ընկերություն) 2020 թվականի դեկտեմբերի 17-ի գրությամբ դիմել է Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով)՝ խնդրելով տասնմեկ ամսով երկարաձգել Հանձնաժողովի 2019 թվականի հուլիսի 31-ի N°278Ա որոշմամբ Ընկերությանը տրամադրված «Արեգ» արևային էլեկտրակայանում (այսուհետ՝ Կայան) էլեկտրական էներգիայի (հզորության) արտադրության ԼԷ N°0647 լիցենզիայով (այսուհետ՝ ԼԷ N°0647 լիցենզիա) ամրագրված կառուցման ժամանակահատվածը: Միաժամանակ, Ընկերությունը ներկայացրել է Կայանը չկառուցելու հիմնավորումներ, ըստ որոնց՝ Կայանի՝ սահմանված ժամկետում չկառուցման պատճառ են հանդիսացել կորոնավիրուսային հիվանդության հետ կապված իրավիճակը, մասնավորապես, դրանով պայմանավորված սահմանափակումները, մատակարարումների և այլ մատակարարների հետ բանակցությունների կասեցումը (որոնց հետևանքով 2020 թվականի հունվարից մինչև հուլիս ամիսը կարողացել է նախագծային և շինարարական աշխատանքներն իրականացնել մասնակի), բանկերի կողմից խոշոր ծրագրերի ֆինանսավորման ժամանակավոր դադարեցումը (պայմանավորված նաև ընդլայնված հողամասի նպատակային նշանակության փոփոխման բարդություններով և սակագնի հնարավոր փոփոխման առնչությամբ Հանձնաժողովի ընդունած նոր իրավակարգավորումներով), ինչպես նաև սեզոնային գործոնը: Սույն թվականի սեպտեմբերի 27-ին Ադրբեջանի Հանրապետության զինված ուժերի կողմից Արցախի Հանրապետության ուղղությամբ

սկսված ռազմական գործողությունները և դրանցով պայմանավորված՝ հայտարարված ռազմական դրությունը, վերոնշյալ հանգամանքները, ինչպես նաև հետագա զարգացումների անկանխատեսելիությունը հաշվի առնելով՝ Ընկերությունը նշել է, որ ի հայտ են եկել այնպիսի հանգամանքներ, որոնք չէին կարող կանխատեսվել կամ կանխարգելվել Ընկերության կողմից, չեն գտնվել և գտնվում վերջինիս վերահսկողության ներքո ու պայմանավորված չեն եղել վերջինիս անզգուշությամբ կամ բացթողմամբ: Որպես Կայանի կառուցման ծրագրի դանդաղեցմանը նպաստող հանգամանք՝ Ընկերությունը նշել է նաև իր կողմից ընդլայնված հողատարածքի նպատակային (գործառնական) նշանակության փոփոխության գործընթացի մասով անորոշությունը, որի շրջանակում դիմել է համապատասխան համայնքի ղեկավարին, ինչպես նաև Հայաստանի Հանրապետության տարածքային կառավարման նախարարություն, Հայաստանի Հանրապետության վարչապետին, սակայն դեռևս պաշտոնական պատասխան չի ստացել: Հիմնավորումներին կից Ընկերությունը ներկայացրել է նաև երկու կազմակերպությունների 2020 թվականի փետրվարի 3-ի և 5-ի գրություններ, որոնց համաձայն՝ Չինաստանում կորոնավիրուսային հիվանդության պատճառով հայտարարված արտակարգ իրավիճակով պայմանավորված՝ սարքավորումների մատակարարումը հետաձգվում է,

բ) Հանձնաժողովը 2020 թվականի դեկտեմբերի 25-ի №ՍՇ/34.1-Մ4-2/5104-2020 գրությամբ Ընկերությանը հայտնել է, որ «Արեգ» արևային էլեկտրակայանի կառուցման պարտավորության չկատարումը Ֆորս մաժորի հետևանք լինելու հարցի գնահատման համար անհրաժեշտ է ներկայացնել համապատասխան հիմնավորումներ, որին ի պատասխան ընկերությունը որևէ հիմնավորում չի ներկայացրել,

գ) Հանձնաժողովի 2013 թվականի նոյեմբերի 1-ի №374Ն որոշմամբ հաստատված՝ էներգետիկայի բնագավառում գործունեության լիցենզավորման կարգի (այսուհետ՝ Կարգ) №3 հավելվածի՝ երաշխիքների ներկայացման և պետական բյուջե փոխանցման կարգի՝

- 7-րդ կետի 1-ին ենթակետի համաձայն՝ Հանձնաժողովը որոշում է ընդունում երաշխիքով սահմանված գումարի կեսը Հայաստանի Հանրապետության պետական բյուջե փոխանցելու մասին, եթե որոշում է ընդունել արտադրության լիցենզիայով սահմանված կառուցման (վերակառուցման) ժամանակահատվածը երկարաձգելու մասին,
- 10-րդ կետի համաձայն՝ լիցենզավորված անձի ներկայացրած երաշխիքով սահմանված գումարը Կարգով սահմանված դեպքերում Հայաստանի Հանրապետության պետական

բյուջե չի փոխանցվում, եթե նրա կողմից լիցենզիայի պայմանների չկատարումը կամ ոչ պատշաճ կատարումը հետևանք է ֆորս մաժորի: Կարգի իմաստով ֆորս մաժոր է համարվում ցանկացած հանգամանք կամ դեպք (դրա հետևանք), որը հանգեցրել է (հանգեցնում կամ կարող է հանգեցնել) լիցենզավորված անձի պարտավորությունների չկատարման կամ ոչ պատշաճ կատարման և միաժամանակ բավարարում է հետևյալ պայմաններին.

- 1) չի գտնվում լիցենզավորված անձի վերահսկողության ներքո.
- 2) լիցենզավորված անձը ձեռնարկել է բոլոր անհրաժեշտ միջոցները և ջանքերը (այդ թվում՝ նախազգուշական, այլընտրանքային, օրենսդրությամբ նախատեսված) նշված հանգամանքները (հետևանքները) կանխելու, վերացնելու, մեղմելու կամ դրանցից խուսափելու համար.
- 3) լիցենզավորված անձը տեղեկացրել է Հանձնաժողովին իրազեկվելուց հետո հնարավորինս սեղմ ժամկետում, բայց ոչ ուշ, քան այդ մասին իրազեկվելուց հետո 10 աշխատանքային օրվա ընթացքում,

դ) Հանձնաժողովը, ուսումնասիրելով առկա փաստական հանգամանքները, գտնում է, որ ԼԷ №0647 լիցենզիայով ամրագրված կառուցման ժամանակահատվածը երկարաձգելու վերաբերյալ Ընկերության հայտը ենթակա է բավարարման, իսկ երաշխիքով սահմանված գումարի կեսը Հայաստանի Հանրապետության պետական բյուջե չփոխանցելու հիմքերը բացակայում են: Մասնավորապես, Կարգի համաձայն՝ երաշխիքով սահմանված գումարը սահմանված դեպքերում Հայաստանի Հանրապետության պետական բյուջե չի փոխանցվում, եթե Ընկերության կողմից լիցենզիայի պայմանների չկատարումը կամ ոչ պատշաճ կատարումը հետևանք է ֆորս մաժորի: Տվյալ դեպքում Ընկերությունը չի հիմնավորել Կայանի կառուցման՝ իր պարտավորության չկատարումը ֆորս մաժորի հետևանք լինելու հանգամանքը: Մասնավորապես, որպեսզի հանգամանքը համարվի ֆորսմաժորային, անհրաժեշտ է, որ այն հանգեցրած լինի կոնկրետ պարտավորության չկատարման, և լիցենզավորված անձը ձեռնարկած լինի բոլոր անհրաժեշտ միջոցներն ու ջանքերը (այդ թվում՝ նախազգուշական, այլընտրանքային, օրենսդրությամբ նախատեսված) նշված հանգամանքները (հետևանքները) կանխելու, վերացնելու, մեղմելու կամ դրանցից խուսափելու համար, մինչդեռ Ընկերությունը, որևէ կերպ չի ապացուցել և չի հիմնավորել իր կողմից մատնանշված հանգամանքների առկայությունը, այն պարագայում, երբ «Վարչարարության հիմունքների և վարչական վարույթի մասին» օրենքի 43-րդ հոդվածի

1-ին մասի «ա» կետի համաձայն՝ անձի և վարչական մարմնի փոխհարաբերություններում ապացուցման պարտականությունը կրում է անձը՝ նրա համար բարենպաստ փաստական հանգամանքների առկայության դեպքում: Մասնավորապես, Ընկերությունը որևէ կերպ չի հիմնավորել թվարկված հանգամանքների առկայությունը և դրանց ուղղակի առնչությունը լիցենզիայով ամրագրված՝ Կայանի կառուցման պարտավորության կատարման անհնարինության հետ, նշված հանգամանքները (հետևանքները) կանխելու, վերացնելու, մեղմելու կամ դրանցից խուսափելու համար բոլոր անհրաժեշտ միջոցներն ու ջանքերը ձեռնարկելու հանգամանքը, մասնավորապես՝ չի հիմնավորել ֆորսմաժորային հանգամանքներով պայմանավորված չինական մատակարարների պատճառով Կայանի կառուցման անհնարինությունը և այլընտրանքային տարբերակների բացակայությունը, իսկ չինական երկու կազմակերպությունների գրություններից պարզ չէ Ընկերության հետ իրավահարաբերությունների բնույթը, ստանձնած փոխադարձ պարտավորությունները և դրանց ազդեցությունը Կայանի կառուցման պարտավորության կատարման վրա: Ընկերությունը չի հիմնավորել նաև բանկային կամ այլ կազմակերպությունների կողմից վարկային միջոցների չտրամադրման ֆորսմաժորային լինելու հանգամանքը, Հայաստանի Հանրապետությունում հայտարարված արտակարգ կամ ռազմական դրության վերաբերելիությունը սահմանված ժամկետում Կայանի կառուցման պարտավորության կատարման անհնարինությանը, և

հիմք ընդունելով «Էներգետիկայի մասին» օրենքի 17-րդ հոդվածի 1-ին մասի «գ» կետը, 30-րդ հոդվածի 1-ին մասը, «Նորմատիվ իրավական ակտերի մասին» օրենքի 1-ին հոդվածի 2-րդ մասը, 33-րդ և 34-րդ հոդվածները, Կարգը, այդ թվում՝ Կարգի №3 հավելվածի՝ երաշխիքների ներկայացման և պետական բյուջե փոխանցման կարգի 7-րդ կետի 1-ին ենթակետը՝ Հանձնաժողովը **որոշում է**.

1. Տասնմեկ ամսով երկարաձգել Հանձնաժողովի 2019 թվականի հուլիսի 31-ի «ԱՐԵԳ ԷՆԵՐԳԻԱ» սահմանափակ պատասխանատվությամբ ընկերությանը «Արեգ» արևային էլեկտրակայանում էլեկտրական էներգիայի (հզորության) արտադրության լիցենզիա տրամադրելու մասին» №278Ա որոշմամբ «ԱՐԵԳ ԷՆԵՐԳԻԱ» սահմանափակ պատասխանատվությամբ ընկերությանը տրամադրված էլեկտրական էներգիայի (հզորության) արտադրության ԼԷ №0647 լիցենզիայով ամրագրված «Արեգ» արևային էլեկտրակայանի կառուցման ժամանակահատվածը՝ որոշման մեջ «2021 թվականի փետրվարի 1-ը» բառերը փոխարինելով «2022 թվականի հունվարի 1-ը» բառերով:

2. Ընկերությանը՝ ԼԷ N°0647 լիցենզիայի պայմանները չկատարելու պատճառով Կայանի կառուցման ժամանակահատվածը երկարաձգելու համար, սույն որոշումն ուժի մեջ մտնելու պահից՝
 - 1) մեկամսյա ժամկետում «ԿՈՆՎԵՐՍ ԲԱՆԿ» փակ բաժնետիրական ընկերության 2019 թվականի հուլիսի 9-ի COD/1076 գրությամբ Հանձնաժողով ներկայացված բանկային երաշխիքի համաձայն երաշխավորված 12 500 000 (տասներկու միլիոն հինգ հարյուր հազար) դրամ գումարից 6 250 000 (վեց միլիոն երկու հարյուր հիսուն հազար) դրամը 900005028130 հաշվեհամարով փոխանցել Հայաստանի Հանրապետության պետական բյուջե.
 - 2) քառասունհինգօրյա ժամկետում Հանձնաժողով ներկայացնել 12 500 000 (տասներկու միլիոն հինգ հարյուր հազար) դրամ գումարի երաշխիք՝ առնվազն մինչև 2022 թվականի փետրվարի 14-ը գործողության ժամկետով:
3. Ընկերությանը՝ ընդունել ի գիտություն, որ իրավասու է սույն որոշումն ուժի մեջ մտնելու պահից երկամսյա ժամկետում այն բողոքարկել Հանձնաժողով կամ Հայաստանի Հանրապետության վարչական դատարան:
4. Սույն որոշումն ուժի մեջ է մտնում 2021 թվականի փետրվարի 1-ից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

Գ. ԲԱՂՐԱՄՅԱՆ

ք. Երևան
-- հունվարի 2021թ.